

Un total di 23 compania pa subi produccion di webo comercial na Aruba

DESPUES di anuncia riba 29 di september un “Open Call”, Minister Geoffrey Wever ta anuncia cu un total di 23 empresario (aspirante) a demostra interes den produccion comercial di webo di galiña na Aruba. Registracionnan ricibi a duna informacion valioso di nos comerciantenan p’asina hunto pusha pa logra e meta di subi produccion comercial.

E ‘open call’ aki ta parti di e maneho economico cu a keda aproba pa Consejo di Minister dia 16 di Augustus ultimo. Segun informacion di Departamento di Asuntonan Economico, den 2023 un total di 738 mil webo di galiña a wordo produci pa comerciantenan local, cu ta representa 15% di e total consumo di webo na Aruba. E meta di e maneho di Ministerio di Asuntonan Economico ta pa redobla e cifranan di aña pasa y yega na 1.4 milyon di unidad pa aña 2026 mirando e potencial p’e industria aki crece.

E informacion ricibi di comerciantenan ta varia di entre otro pidi un permiso di negoshi t’e necesidad di mas tereno pa por subi produccion comercial di webo di galiña na Aruba.

“Dialogo y colaboracion continuo cu comerciantenan ta necesario pa tin mas actividad economico. E resultado di e “open call” ta demostra cu nos comerciantenan tin e ambicion pa produccion local di webo di galiña yega 100 porciento”, minister Geoffrey Wever a expresa.

E siguiente paso ta hunto cu e departamento concerni,



resolva e diferente retonan cu comerciantenan a indica manera entre otro ampliacion di tereno. Cada comerciante lo ricibi un invitacion di Ministerio di Asuntonan Economico pa un sesion informativo cu e departamentonan DEZHI, Santa Rosa y DIP pa hunto pusha e industria di webo como pilar economico.

Minister Geoffrey Wever ta gradici tur comerciantenan cu a participa n’e “Open Call” pa stimula e industria di webo. *“Ta importante e dialogo continuo cu comerciantenan pa hunto pusha e produccion di webo y no depende mas di importacion. E interes demostra ta subraya mas ainda nos compromiso pa duna e sosten y guia necesario pa logra nos ambicion cu como pais nos mes ta produci 100 porciento webo di galiña”,* segun minister Geoffrey Wever.

Skirbimento creativo pa principiante



BIBLIOTECA Nacional Aruba ta ofrece un curso cortico di skirbimento creativo cu ta cuminsa na november. Docente di curso ta autor local, sr. Vi Frank jr. E nivel ta Principiante. E curso ta un biaha pa siman y lo dura 8 siman. E curso aki ta tuma luga na biblioteca na Playa y ta pa adulto y hoben. Instruccion ta na Papiamento.

E curso aki ta dialuna atardi di 5or pa 7or, ariba e dianan; 4 y 6 di november, 11, 18, 25 di november y tambe 2 y 9, 16 di december 2024. Por registra via e-mail: curso@bna.aw of yama na biblioteca # 528 1504. E curso ta costa 150 florin pa persona. Registracion ta cera diabierna dia 25 di october y cupo ta limita.

Esaki ta interesante pa tur esnan cu ta gusta skirbi ficcion y ta desea di sigui siña mas y haya guia for di sr. Vi Frank jr. Participantenan ta haya tarea pa traha ariba den weekend y pa practica.

Sr. Vivienno Frank jr. a publica 2 buki y actualmente ta trahando riba un di tres publicacion.

‘[Damnatio ad bestias](#)’ (2020) y tambe [Outpost Alto Vista and other cosmic horrors from Aruba](#) (2020). Tur dos buki miembronan por fia na biblioteca y nan ta obtenibel na libreria local tambe pa compra.